

Renobacion y expansion di hospital; proyecto importante pa mihor cuida medico na Aruba

DIAMARS awor Parlamento di Aruba ta trata e proyecto grandi cu ta ensera expansion y renobacion di Dr. Horacio Oduber Hospital. Aruba a crece y ta necesario pa hospital wordo amplia cu mas facilidad pa brinda e mihor cuida medico na comunidad di Aruba.

E plannan cu tin riba mesa ta ambicioso y ta pas perfecto den e tempo di awe na unda mundo ta cambiando den forma rapido y cu e cambio continuo aki e exigencia pa un mihor calidad di cuida.

Ta p'esey cu diseñando e plannan pa un hospital di futuro Buro di Arkitekto Bermello, Ajamil y Partners encarga cu e diseño a tene cuenta cu tur aspecto y tambe cu e deseonan di personal di hospital.

E proyecto renobacion y expansion di Dr. Horacio Oduber Hospital ta costa ca. 100 milyon

dollar. E placa aki ta wordo paga dor di SOGA (Stichting Onroerend Goed Aruba) cu ta encarga cu de proyecto aki. Esaki ta bay den concordancia cu Gobierno di Aruba. SOGA t'e fundacion cu ta busca e fianza pa por realisa e proyecto. Ora e keda cla, SOGA ta lease e edificio na Gobierno cu na su turno ta dun'e den uzo na hospital.

E actual edificio di Dr. HOH a wordo construi na 1976 cu un cantidad di 320 cama. Awor, na 2013, e tempo a yega pa haci tur

e cambio y adaptacionnan necesario pa converti e hospital den uno moderno cu tur facilidad.

Prome Minister Mike Eman algun luna pasa a haya un presentacion amplio di dr. Jaime Falconi di e plannan di cambionan inmenso cu tin pa Dr. Horacio Oduber Hospital. N'e ocasion ey Eman a bisa cu ora e proyecto di renobacion y expansion di Dr. HOH a bin dilanti, e idea mesora a wordo brasa pa su Gabinete.


Esaki pasobra e ta un necesidad

p'e paciente y pa tur cu ta traha cu y p'e paciente. Pa tur cu ta haci e diferencia p'e paciente, pa Aruba, e comunidad aki, e proyecto aki ta necesario.

"Aruba a conoce un crecimiento economico rapido. Gran parti di e placa cu ta wordo inverti den e proyecto di renobacion y expansion di nos hospital ta bin di e desaroyo aki. Sinembargo, e desaroyo aki no semper a wordo traduci den e bienestar general di e comunidad aki di e manera cu nos kier a wak'e. Mi no ta cansa di bisa cu mescos

cu nos kier tin hotel di 5 strea, nos kier tin scolnan di 5 strea, barionan di 5 strea, casnan di anciano di 5 strea y sigur un hospital di 5 strea. Awe hunto nos ta trahando pa bin cu e hospital di 5 strea", Eman a bisa durante e presentacion.

Diamars, esta mañan dia 8 di januari, e proyecto di renobacion y expansion di Dr. Horacio Oduber Hospital ta bay wordo trata den Parlamento di Aruba. E ta muestra di ta un debate interesante.



Dr. Horacion Oduber Hospital Masterplan: Scematic Design - Exterior Views